

## О'zbekistonda huquqbuzarliklar profilaktikasi sohasi va unda olib borilayotgan islohatlar

**Toshbotirov Javlonbek G'ulomjon o'gli**  
**O'ZBEKISTON RESPUBLIKASI ICHKI ISHLAR**  
**VAZIRLIGI AKADEMIYASI KURSANTI**

### ANNOTATSIYA

Maqolada O'zbekiston Respublikasida huquqbuzarliklar profilaktikasi sohasi, uning nima ekanligi, huquqiy asosi, huquqbuzarliklar profilaktikasining turlari, uni amalga oshiruvchi organlar, bu sohadagi islohotlar va sohani rivojlantirishga oid takliflar keltirib o'tilgan.

**Kalit so'zlar:** huquqbuzarliklar profilaktikasi, huquqiy asos, profilaktika turlari, amalga oshiruvchi organlar, islohotlar, profilaktika inspektori, takliflar.

Har bir davlat bor ekanki, o'z huquq tizimi va qonunlari mavjud. Barcha fuqarolar belgilangan qonunlarga birdek amal qilishi va boshqalarning huquqlariga putur yetkazmasligi lozim. Bu davlatning rivoji va tinchligi uchun eng muhim omillardan biri hisoblanadi. Qonundan chetga chiqish esa huquqbuzarlikni keltirib chiqaradi. Huquqni muhofaza qiluvchi organlar sodir etilgan huquqbuzarlikka qarshi kurashishadi: aybdorni topishadi, so'roq qilishadi, sabablarni aniqlashadi va hokazo. Buning uchun ko'p mablag' va ishchi kuchi kerak bo'ladi. Shu sabab huquqbuzarlik sodir bo'lishidan avval uni oldini olgan ma'qul. Bunday holatda huquqbuzarliklar profilaktikasi sohasi bizga yordamga keladi.

Xo'sh huquqbuzarliklar profilaktikasi o'zi nima degani? Bunda profilaktika so'ziga e'tibor berish lozim. **Profilaktika**<sup>1</sup> so'zi lotincha so'z bo'lib ma'nosi "oldini oluvchi", "saqlovchi" degan ma'nolarni anglatadi. Bundan kelib chiqadiki, huquqbuzarliklar profilaktikasi deganda huquqbuzarliklarni oldini olish tushuniladi. Yanada aniq huquqiy javob "Huquqbuzarliklar profilaktikasi to'g'risida"gi Qonunning 3-moddasida keltirib o'tilgan: "Huquqbuzarliklar profilaktikasi<sup>2</sup> — huquqtartibotni saqlash hamda mustahkamlash, huquqbuzarliklarni aniqlash, ularga barham berish, shuningdek huquqbuzarliklarning sodir etilishi sabablarini va ularga imkon berayotgan shart-sharoitlarni aniqlash, bartaraf etish maqsadida qo'llaniladigan huquqbuzarliklar umumiyligi, maxsus, yakka tartibdagi va viktimologik profilaktikasining huquqiy, ijtimoiy, tashkiliy va boshqa chora-tadbirlari tizimi".

Huquqbuzarliklar profilaktikasining huquqiy asosi haqida. Mustaqillikka erishganimizdan so'ng huquqbuzarliklar sohasini amalga oshirishga oid, yanada takomillashtirishga oid juda ko'plab qonun va qarorlar qabul qilingan. Ammo, 2014-yil 14-mayda qabul qilingan "Huquqbuzarliklar profilaktikasi to'g'risida"gi Qonun bu sohada haqiqiy tub burilish bo'lib xizmat qildi. Chunki shu sanaga qadar huquqbuzarliklar profilaktikasi sohasini tartibga soluvchi yagona rahbariy qonun

<sup>1</sup>[https://uz.wikipedia.org/wiki/Profilaktika#:~:text=Profilaktika%20\(yun.,rivojlanishini%20yaxshilashga%20qaratilgan%20chora%20tadbirlar.](https://uz.wikipedia.org/wiki/Profilaktika#:~:text=Profilaktika%20(yun.,rivojlanishini%20yaxshilashga%20qaratilgan%20chora%20tadbirlar.)

<sup>2</sup> O'zbekiston Respublikasining qonuni "Huquqbuzarliklar profilaktikasi to'g'risi"da qonuni 2014-yil 14 may. <https://lex.uz/acts/-2387357>

hujjati yo‘q edi. Bu qonunda ilk bora huquqbazarliklar profilaktikasi nima ekanligi, uning prinsiplari, turlari, huquqbazarliklar profilaktikasini amalga oshiruvchi organlar haqida batafsil ma’lumotlar berib o‘tilgan. Huquqbazarliklar profilaktikasining qanday turlari mavjud? “Huquqbazarliklar profilaktikasi to‘g‘risida”gi Qonunda huquqbazarliklar profilaktikasining quyidagi turlari ko‘rsatib o‘tilgan: - huquqbazarliklarning umumiy profilaktikasi; - huquqbazarliklarning maxsus profilaktikasi; - huquqbazarliklarning yakka tartibdagi profilaktikasi; - huquqbazarliklarning viktimoologik profilaktikasi.

Huquqbazarliklar profilaktikasini amalga oshiruvchi va unda ishtirok etuvchi organlar hamda muassasalarning huquqbazarliklarning oldini olish, huquqbazarliklarning sodir etilishi sabablarini va ularga imkon berayotgan shartsharoitlarini aniqlash, bartaraf etish bo‘yicha faoliyati huquqbazarliklarning umumiy profilaktikasi hisoblanadi. Bunda kam mablag‘ va ishchi kuchini jalb etgan holda ko‘proq natijaga erishish ko‘zda tutiladi. Masalan, televideniya, radio, ijtimoiy tarmoqlar orqali yoki davra suhbatlari va hokazolar orqali profilaktik ogohlantiruvlar e’lon qilish. Huquqbazarliklar profilaktikasini bevosita amalga oshiruvchi organlar va muassasalarning ayrim turdagи huquqbazarliklar profilaktikasiga, bu turdagи huquqbazarliklarning sodir etilishi sabablarini va ularga imkon berayotgan shartsharoitlarni bartaraf etishga, ayrim toifadagi shaxslarni aniqlash va ularga profilaktik ta’sir ko‘rsatishga qaratilgan maxsus tadbirlarni ishlab chiqish hamda amalga oshirishga doir faoliyati huquqbazarliklarning maxsus profilaktikasidir.

Ayrim toifadagi yoki mavsumiy huquqbazarliklarga qarshi aynan maxsus profilaktika qo‘llaniladi. Masalan, giyohvand moddalarga qarshi “Qoradori” maxsus profilaktik tadbiri, voyaga yetmaganlar toifasi uchun profilaktik tadbirlar va hokazo. Huquqbazarliklar profilaktikasini bevosita amalga oshiruvchi organlar va muassasalarning g‘ayriijtimoiy xulq-atvorli, huquqbazarliklar sodir etishga moyil bo‘lgan, huquqbazarliklar sodir etgan shaxslarni aniqlash, ularning hisobini yuritish va ularga tarbiyaviy ta’sir ko‘rsatishga doir faoliyati huquqbazarliklarning yakka tartibdagi profilaktikasidir. Huquqbazarliklar profilaktikasining bu turi shaxslar bilan individual tarzda ishlashni nazarda tutadi. Bunda shaxsning xulq-atvori, psixikasi va boshqa jihatlari hisobga olingan holda quyidagi chora-tadbirlar qo‘llanishi mumkin: profilaktik suhbat, rasmiy ogohlantirish, majburiy davolanishga yuborish va hokazo.

Huquqbazarliklar profilaktikasini bevosita amalga oshiruvchi organ yoki muassasaning muayyan shaxsning huquqbazarlikdan jabrlanuvchiga aylanishi xavfini kamaytirishga qaratilgan profilaktika chora-tadbirlarini qo‘llashga doir faoliyati huquqbazarliklarning viktimoologik profilaktikasidir. Huquqbazarliklarprofilaktikasining bu turi ma’lum bir toifadagi shaxslarning muayyan huquqbazarliklar oqibatida jabrlanuvchi bo‘lib qolishini oldini olishni nazarda tutadi. Huquqbazarliklar profilaktikasini qaysi organlar amalga oshiradi? Huquqbazarliklar profilaktikasini quyidagi organlar amalga oshiradi: <sup>3</sup> - ichki ishlar organlari; - prokuratura organlari; - Davlat xavfsizlik xizmati organlari; - O‘zbekiston Respublikasi Prezidenti davlat xavfsizlik xizmati organlari; - O‘zbekiston Respublikasi

<sup>3</sup>. O‘zbekiston Respublikasining qonuni “Huquqbazarliklar profilaktikasi to‘g‘risi”da qonuni 2014-yil 14 may.  
<https://lex.uz/acts/-2387357>

Milliy gvardiyasi organlari; - O‘zbekiston Respublikasi Korrupsiyaga qarshi kurashish agentligi; - adliya organlari; - davlat bojxona xizmati organlari; - davlat soliq xizmati organlari; - mehnat organlari; - ta’limni davlat tomonidan boshqarish organlari va ta’lim muassasalar; - davlat sog‘liqni saqlash tizimini boshqarish organlari va sog‘liqni saqlash muassasalar; - O‘zbekiston Respublikasi Ekologiya va atrof-muhitni muhofaza qilish davlat qo‘mitasi organlari va boshqalar. Yuqorida sanab o‘tilgan davlat organlarining huquqbazarliklar profilaktikasini amalga oshirishdagi vazifalari bir-biridan farq qilishi mumkin, ammo barchasining zamirida bir maqsad ya’ni huquqbazarliklarni oldini olish maqsadi mujassam. Fikrimizcha, huquqbazarliklarni oldini olishga nafaqat sanab o‘tilgan organlar, balki xususiy korxona, tashkilot, muassasalar va fuqarolar ham birdek ma’suldirlar.

Bu sohada amalga oshirilayotgan islohotlar. So‘nggi yillarda bu sohaga qaratilayotgan e’tibor juda ham katta hisoblanib, davlat siyosati darajasiga ko‘tarildi. Chunki, yildan-yilga huquqbazarliklar soni ortib borayotgan edi. Bu holatda sohaga yanada bilimli, malakali va fidoiy kadrlar zarurligi ko‘rinib qoldi. shu maqsadda ko‘plab islohotlar amalga oshirilmoqda. Bilamizki, sohaning asosiy ishchi kuchi profilaktika inspektorlari hisoblanadi. Ularning samarali ishlashi uchun barcha zarur shart-sharoitlar yaratib berilmoqda, oylik maoshlari oshirilmoqda, xizmat uylari berilmoqda. Buni davlatimiz rahbari Shavkat Mirziyoyev ham quyidagi gaplari orqali ta’kidlab o‘tgan: “Profilaktika inspektorlari faoliyatini takomillashtirish, ularning shaxsiy mas’uliyatini oshirish, sodir etilgan har bir jinoyatni tahlil qilish, jinoyatchilikni professional darajada aniqlash lozim. Profilaktika inspektorlari xizmat uylari, imtiyozli kreditlar asosida mashinalar bilan ta’minlanayotgani ular mahallaning har bir xonadoni bilan samarali ishlashida muhim ahamiyat kasb etmoqda”.

Sohani yuridik kadrlar bilan taminlash uchun Toshkent davlat yuridik universiteti Ixtisoslashtirilgan filiali tashkil etildi. Bu ta’lim maskani orqali sohaga yuridik kadrlarni bosqichma-bosqich yetkazib berish ko‘zda tutilgan. Huquqbazarliklar profilaktikasi sohasini yanada rivojlantirish yo‘llari. Huquqbazarliklar profilaktikasini sohasini yanada takomillashtirishga oid quyidagi shaxsiy fikrlarni bayon etsak: Birinchidan, sohada yuridik kadrlar juda ham oz miqdorda. Shu sabab yuqoridagidek huquqbazarliklar profilaktikasiga yuridik kadrlarni tayyorlovchi oliy ta’lim muassasalarini maqsadli ko‘paytirish lozim. Ikkinchidan, profilaktika inspektorining ish yuklamasi va ish soatini qayta ko‘rib chiqish lozim. Bunda profilaktika inspektorlariga har qanday tegishli bo‘lmagan mansabdor shaxs yoki davlat organi tomonidan o‘z xizmat faoliyatiga bog‘liq bo‘lmagan vazifalar berilishini qat’iyan taqiqlash shart. Ish soati ko‘pligidan esa oilasi va boshqa ishlarga vaqt topa olmaydi. Bu haqida Shavkat Mirziyoyevning quyidagi jumlalarini keltirib o‘tish o‘rinli: “Qaysi hokim profilaktika inspektorini qabul qilib, gaplashdi? Uning bir kunlik ishini, oilaviy sharoitini o‘rgandi? Hamma “kattakon” uchastka noziriga buyruq beradi. U hamma narsa bilan shug‘ullanyapti, ko‘p vaqt yo‘qotyapti, asosiy ishi qolib ketyapti. O‘zi eng katta mehnatkash – profilaktika inspektori. Agar unga sharoit yaratsak, u davlatdan rozi bo‘lib ishlasa, ko‘p masalalar hal bo‘ladi”. Uchinchidan, aholining huquqiy ongini oshirishga doir chora-tadbirlarni kuchaytirish.

Aholida huquqiy ong qanchalik kuchli bo‘lsa, huquqbazarliklarning sodir etilish darajasi ham o‘z-o‘zidan kamayadi. To‘rtinchidan, sohaga faqatgina yetarli bilim va

ko'nikmaga ega bo'lgan nomzodlarni qabul qilish tizimini yo'lga qo'yish va ularning muomala madaniyatiga alohida e'tibor qaratish lozim. Xulosa qilib aytadigan bo'lsak, huquqbazarliklar profilaktikasi sohasiga qaratilayotgan e'tibor natijasida hozirgi kunga kelib huquqbazarliklarning sodir etilish darajasi sezilarli kamayib bormoqda va ishonamizki, yaqin yillar ichida bu ko'satkichlar bundanda ijobiyoq ko'rinishga keladi. Shu sabab sohaga e'tiborni bir zumga ham kamaytirmaslik lozim. Tinchlik bu buyuk ne'mat. Tinchlikni saqlovchilar esa bu ne'matning qanchalik muhim va totli ekanligini juda yaxshi bilishadi. Aholi ham bu ne'matning qanchalik muhim va kerak ekanligini anglab yetmoqda, shu sabab jamiyat, davlat rivojlanmoqda va yuksalmoqda.

Xulosa qilib shuni aytishimiz mumkin bo'ladiki huquqbazarliklar profilaktikasi sohasida juda keng ko'lamdagи islohotlar amalga oshirildi. Huquqbazarliklar profilaktikasi sohasi bu davlat tizimidagi eng kerak bo'lgan muhim sohalardan bo'lGANI bois so'ngi yillarda alohida e'tibor qaratilmoqda. Ushbu o'zgarishlar amaliy jihatdan ham o'z aksini topib bormoqda. Huquqbazarliklar profilaktikasi sohasi ham moddiy ham huquqiy jihatdan ham yetarlicha ta'minlandi desa hech ham adashmagan bo'lamiz.

## FOYDALANILGAN ADABIYOTLAR

1. Sh.M.Mirziyoevning "Sud-huquq tizimini yanada isloh qilish, fuqarolarning huquq va erkinliklarini ishonchli himoya qilish kafolatlarini kuchaytirish chora-tadbirlari to'g'risida"gi Farmoni 21.10. 2016 yil.
2. Yangi O'zbekiston gazetasi elektron Manbaa: <https://yuz.uz/uz/news/jamoat-xavfsizligini-taminlashda-profilatika-inspektorining-roli-qanday>.
- 3.O'zbekiston Respublikasi IIVning rasmiy veb sayti elektron Manbaa: <https://iiv.uz/news/profilaktika-inspektorlarining-faoliyati-bilan--bogliq-ezgu-tashabbuslar-> 3O'zbekiston Respublikasi IIVning rasmiy veb sayti elektron Manbaa: <https://iiv.uz/news/profilaktika-inspektorlarining-faoliyati-bilan--bogliq-ezgu-tashabbuslar>.
4. O'zbekiston Respublikasining Yangi taxrirdagi Konstitutsiyasi 2023-yil
5. Ichki ishlar organlari to'g'risidagi qonun 2016-yil 16-sentyabr
6. Huquqbazarliklar profilaktikasi to'g'risidagi qonun 2014-yil 14may
7. 2021-yil 26-martda O'zbekiston Respublikasi Prezidentining "Jamoat xavfsizligini ta'minlash va jinoyatchilikka qarshi kurashish sohasida ichki ishlar organlari faoliyatini sifat jihatidan yangi bosqichga ko'tarish chora-tadbirlari to'g'risida"gi farmoni.
8. 2022-yil 18-may kunidagi "O'zbekiston Respublikasi Milliy Gvardiyasi to'g'risida"gi qonuni
9. O'zbekiston Respublikasining qonuni "Huquqbazarliklar profilaktikasi to'g'risi"da qonuni 2014-yil 14 may. <https://lex.uz/acts/-2387357>